

Jim Hepple di AHATA

90% di Aruba su economia ta depende di turismo y esey por ta exitoso unicamente si nos tin un percepcion positivo den exterior



ORANJESTAD (AAN): Cu e aprobacion di e ley di CAFT den Parlamento siman pasa a surgi un ola di comentario y di diferente tipo di interpretacion pa cu e ley aki, cu na mes momento a crea mas confusion den nos comunidad. Consecuentemente Minister di Finanzas, Angel Bermudez ta haci enfasis y clarifica cu e ley di CAFT ta un ley instrumental y no un ley di maneho, pues e no ta contene ningun tipo di 'medida' ni tampoco ta trata of toca aspectonan manera

'indexering' of 'vakantie uitkering' den e contenido di e ley. Segun splicacion di e mandatario e ley aki di CAFT ta basicamente un refuerso di e ley di contabilidad di aña 1989 cu su sancionnan adicional. Minister Bermudez ta sigui splica cu e ley aki ta contene hopi formalidad y ta aporta un disciplina pa entrega tur tipo di informacion necesario pa facilita e trabao di Parlamento. "Articulo 1 di e ley ta defini cu unicamente e Minister


di Finanzas ta suheto y alavez responsabel pa cu e ley aki di CAFT y ta existi na e Minister concerni pa entrega informenan regular, reportahenan periodico y cuentanan anual por ehempel cu ta trece cun'e hopi mas transparencia den ehecutcion di e presupuesto" asina Minister Bermudez a sigura. E mandatario a indica cu awendia institutonan di supervision no ta un fenomeno desconoci rond mundo, pues mas pais a incorpora esaki den nan maneho di finanzas

publico. "Den tur e diferente posicionnan cu mi a eherce den mi carera profesional semper mi a traha bou un tipo di supervision, pues esaki no ta nada straño", Minister a bisa.

Ademas Minister Bermudez a clarifica cu e debenan cu Pais Aruba tin acumula desde aña 1986 a hiba nos unda cu nos ta awo, "E falta di responsabilidad y cumplimento pa cu impuestonan, pago di prestamonan di estudio y e suma grandi cu Gobierno a duna na subsidio durante añanan largo sin cu a worde duna cuenta, ta haci cu e necesidad pa nos incorpora un instituto di supervision actualmente ta mas grandi cu nunca".

Structuralmente e cuentanan anual a demostra cu Gobiernonan no a keda den e cuadro di nan presupuesto manera aproba y cu e deficitnan aki mester a worde kubri cu fianzanan, cu awe tambe ta forma nos debe nacional.

E mandatario di Finanzas, ta confirma cu en berdad e ley di CAFT ta temporal, pues lo keda na vigor te ora Aruba su presupuesto no tin deficit mas.



Asina cu Aruba su presupuesto ta uno balansa e colegio CAFT lo worde reemplaza cu un 'Fiscal Council', pues e ley ta temporal pero e supervision mester ta permanente. Finalmente e Minister Bermudez ta lamenta cu e debate durante e tratamento di e ley den Parlamento casi no tabatin contenido, pero mas bien un avalancha di emocion, insulto y difamacion, ademas cu na cierto momento e tabata sinti'e mas bien den un gayero cu den e instituto mas prestigioso di nos democracia, cual ta nos Parlamento.